

Awe Edjean ta lansa tema promocional di fin di aña!

Y ta yama danki na tur esnan cu a demostra sosten na su concierto di dia 2



ORANJESTAD - Despues di un anochi sumamente exitoso den Cas di Cultura, Edjean Semeleerta anuncia su siguiente paso. Esaki ta tuma lugar awe, Dialuna, durante henter dia. Edjean lo bishita e emisoranan local pa asina lansa su tema promocional pa e temporada cu ta den porta.

Esaki por wordo considera como e temporada mas exitoso pa e hoben cantante aki ya cu el a crea henter un celebracion unico pa e pueblo di Aruba cu e proyecto “Hey... ta Pasco!”. Un proyecto cu a cuminsa hopi chikito, pero cu a bira e proyecto mas grandi cu un artista local ta presenta.

Despues di e concierto fantastico cu a wordo presenta dia 2 di October ultimo, por scucha ainda un sin fin di comentarionan sumamente



positivo di e publico grandi cu tabata presente. Por a te hasta sinti cu e concierto aki a sirbi como adrenalina pa a hasi e demanda pa e siguiente concierto aun mas grandi. Informacion cu nos ta dispone di dje ta indica cu e composicion di e aña aki ta den man di e maestro Chucho Hoek y musicalisacion den man di Hildward Croes. Pues un tema cu sigur lo resalta pa su calidad halto y su efecto pegahoso cu indudablemente lo crea un ambiente alegre pa tur cu scuche.

Pa loke ta e concierto “Bek na mi raiznan” cu a wordo presenta den Cas di Cultura, Edjean y henter e ekipo organizador di su proyectonan, kier a hasi uso di e oportunidad pa gradici tur hende cu a yuda hasi un otro soño, un realidad. Un artista cu kier yega leeuw den su carera, lo no por logr’e solamente su so. E tin mester

di ayudo di varios persona cu ta kere den su talento y cu ta apoy’e pa e bay dilanti. Pa loke ta “Bek na mi raiznan”, gradicimento masha special ta bay na UNOCA y tambe Tiara Air cu a kere den e proyecto importante aki. Tambe na prensa local pa a hiba e noticia hopi mas cerca di pueblo.

Danki tambe ta bay na e artistanan invita cu a duna e concierto un toke extra special. E musico- y corista nan pa nan empeño pa presenta un concierto di kita sombre y un danki grandi y masha special na e publico cu a asisti e anochi ey pa asina celebra, comparti y apoya Edjean. Nos ta invita bo pa ta pendiente henter dia y ta den sintonia di bo emisora preferi pa asina bo por scucha e tema promocional, cu asina ta habri caminda tambe pa e tremendo proyecto “Hey... ta Pasco!” cu e aña aki lo ta mas grandi cu nunca.

